

# A Ruana Raukea e Paulus i Here Lakea ne Huriki a Korin

**A Nita Vakalohoka**

A ruana raukea iea e Paulus i here lakea ne huriki a Korin na tahuna i tahoka a maredoa turane ria. Ranga bakovi na tara ne Kristo o Korin ri ta hale ne Paulus, pali ngane e Paulus i vakasiri i ngaru ni valemu turane ria ge bele kavakava a ni vivi vona.

E Paulus i herea a raukea iea na pida i taku o na pida i rua muri na tahuna i herea a raukea muga.

---

**E Paulus i Talo e Huriki**

**1** <sup>1</sup>Iau, e Paulus, a apostolo ne Isu Kristo, na ningaru na Vure. Maria e Timoti, a turane hita, miri herea a raukea iea.

I lakea ne mua e huriki a tara na Vure mu made o Korin, turana e huriki a tara na Vure ri made na tabeke lobo ne Akaia.

<sup>2</sup>A Vure, e tamane hita, turana e Bakovi Dagi e Isu Kristo, ru gu rata kamumu mua, ru gu habi a nivalemu ne mua.

**E Paulus i Kavurikea a Vure**

<sup>3</sup><sup>b</sup>Si gi kavurikea a Vure, e Tamane Bakovi Dagi ne hita, e Isu Kristo, e Tamane hita i dodo hita, a Vure i luke hita. <sup>4</sup>I luke maria na tahuna miri bole a maredoa, lakea maria ranga, bara miri luke e huriki ranga ri bole a maredoa na naro a Vure i luke maria vona. <sup>5</sup><sup>c</sup>Miri bole a nimadihi i kupo a vuhuna miri rihi e Kristo. I mavonga, e Kristo bara i luke hateka maria. <sup>6</sup>Na tahuna miri bole a maredoa, bara i kori mua, ni gi luke mua, ni gi korimule mua. Na tahuna a Vure i luke maria, bara i kori mua, ni

---

<sup>a</sup> 1:1 Apo 18:1    <sup>b</sup> 1:3 Rom 15:5    <sup>c</sup> 1:5 Sng 34:19

gi luke mua. Mua ranga mu hatakia na tahuna mu hatenono, mu kaloho a nimadihi, ra maka nimadihi miri bole pali. <sup>7</sup>Miri lohoka muholi vona, a Vure ge luke mua i manga a hini i luke maria, a vuhuna mu bole a nimadihi i manga maria miri bole a nimadihi.

<sup>8</sup><sup>d</sup>Mua o huriki a turagu, a ngaru mu gu lohoka vona a nimadihi a bolea o Asia. A nimadihi a bolea i dagi hateka, a keri ni kalohoa, lakea a luhoi ta ga mate. <sup>9</sup>I muholi, a luhoi ta ga mate. I bele mavonga, i uka ma ga luhoi tora mule iau. Ga luhoi tore a Vure, ra Vure i vakamahuri mule na matenga e huriki ri mate pali. <sup>10</sup><sup>e</sup>I korimule iau vona a maregoa dagi ie. Muri ma, tabu, bara i korimule iau. A luhoi tore a, ge korimule iau vakaroro. <sup>11</sup>Mua ranga, mu kori iau, mu vasileki. Bara mu rata mavonga, e huriki ala kupo bara ri kavurikea a Vure na hini i longo a nivasileki ne huriki ala kupo, i vakabagetu iau.

### E Paulus i Uka Ma i Tami e Huriki a Korin

<sup>12</sup>A vivi vona a hini a hategu i uka ma i hataki hale vona tara maki a ratea. A nimadegu, a Vure i rata iau a made malamala. A maki lobo a rata, i uka ma a tami e huriki. I uka ma a luhoi tora a lohokanga na bakovi. A luhoi tore a naro kamumu na Vure. A naro nga a rata na matane huriki na malala. A rata hateka na matane mua. <sup>13</sup>A ngava a here mu gi, mu longokilala kunana. A ngaru mu gu longokilala liu, <sup>14</sup><sup>f</sup>i manga a hini mu longokilala popote pali. Muri ma na tahuna a Bakovi Dagi e Isu ge hamule valai, bara mu vivi nau, ge manga a hini iau a vivi ne mua.

<sup>15</sup>A lohoka vona, lakea ta ga lakene taro ne mua, ga matai mua balaka rua. <sup>16</sup><sup>g</sup>Ta ga lakene ne mua muga ni lakea o Masedonia. Muri ta ga made tabu turane mua na tahuna a hamule valai o Masedonia, mu gu kori iau, ga hamule lakea o Judea. <sup>17</sup>Ra mua, mu luhoi iau ta iau a viri ni pulo tavula a nitagu a ta maea? Mu luhoi iau, ta a ramai a naro na malala a rata puru a dalagu, a ta rua, a ta maea, “Ga lakene, i uka ma ga lakene?”

<sup>18</sup>A Vure i ramai vakaroro a ngava i taki. Iau tara, na tahuna a taki ga rata a maki, i uka ma ga pulo tavula a ngavagu. <sup>19</sup><sup>h</sup>E Isu Kristo, a Tuna Vure, ra viri mateu e Sailas, e Timoti mete vakalongo mua vona, i uka ma i pulo lae a ngavana. E Isu i ramai vakaroro a ngava i taki. <sup>20</sup><sup>i</sup>A maki lobo a Vure i ta muholi vona ri bele muholi ne Isu. I mavonga si gi kavurike poloa ne Isu a Vure, si taki i muholi si kavurikea. <sup>21</sup>A Vure kunana a viri i rata hita si pesi tora ni rihi e Kristo. I vulaki hita, <sup>22</sup><sup>j</sup>i rua a kilakila ne hita, i vakasiri hita ne vona. I habi ne hita a Hanuna, ge made na hatene hita, i vakasiri manga i muholi hateka ge konamule hita.

<sup>d</sup> 1:8 Apo 19:23; 1Ko 15:32   <sup>e</sup> 1:10 2Tim 4:18   <sup>f</sup> 1:14 2Ko 5:12; Pili 2:16

<sup>g</sup> 1:16 1Ko 16:5-6; Apo 19:21   <sup>h</sup> 1:19 Apo 18:5   <sup>i</sup> 1:20 Kap 3:14<sup>i</sup> 1:22 2Ko 5:5; Epe 1:13-14

<sup>23</sup>A Vure i lohoka nau, iau a ta muholi na matana. I uka ma a lakene tabu o Korin, a vuhuna a koi ni vakamadihi mua. <sup>24</sup><sup>k</sup>I uka ma mete rata polo muga muga mete ge taki mua mu gu luhoi navai. Mete leho palupu turane mua, mu gu vivi, mu gu pesi tora na niluhoi tora.

**2** <sup>1</sup>I mavonga, a koi ni gosi tabu mua, ga vakamadihi tabu mua. <sup>2</sup>Iau bara vakamadihi mua, mu gu vakapitei navai iau? A vakamadihi pali mua. <sup>3</sup>Pali a ngava a here muga, a here mu gu pulo a vilone mua i uka ma mu gu habi a nimadihi nau. Mua kunana a viri bara mu vakapitei iau. Pali mua bara mu ramai a ngava a here na raukea iea, bara mu vivi, lakea iau tara bara vivi. <sup>4</sup><sup>m</sup>Na tahuna a herea a raukea muga, i lege hateka a lohogu, a tangi. Iau a here lakene, i uka ma a ngaru ni vakamadihi mua. A here lakene, mu gu lohoka vona, iau a ngaru hateka mua.

### A Nipuga Vuroki a Naro Hale

<sup>5</sup>Ra bakovi i ratea a maregoa iea, i uka ma i vakamarego iau kunana. Mua ranga, i vakamarego mua. Pali a koi ni rata hateka a ngava vona. <sup>6</sup>A nimadihi mua ala kupo mu habia vona a bakovi iea, i kara ia pali. <sup>7</sup>Ngane mu longo kaburungi a naro hale vona, mu lukea, ma ge dodo hateka, ge rihate. <sup>8</sup>Na naro iea kunana, a ngaru hateka mu gu vakasiri tabu ia, mu ngaru hateka ia. <sup>9</sup>I muga a here lakene mua, a ngaru ni toni mua, mu gu longototo a ngavagu lobo, o ge uka. <sup>10</sup>E rei a viri mu lohopile a maregoa vona, iau tara a lohopile. Ge muholi ge tahoka a maregoa i rata virihi iau vona, na rane Kristo, a lohopile a naro hale vona, a vuhuna a ngaru mua. <sup>11</sup><sup>n</sup>A rata mavonga, e Satan i uka ma ge tami hita. I uka ma si manga vona a narona.

### Si Mulangi Turane Kristo

<sup>12</sup><sup>o</sup>Na tahuna a bele o Troas<sup>p</sup> ta ga vakalongo e huriki vonga na Velenga Kamumu ne Kristo, a masia e Bakovi Dagi i ratea pali a dalagu, ga ratea a leho vona. <sup>13</sup><sup>q</sup>Pali i uka ma a hataki kamumu, a vuhuna i uka ma a matavisia vonga a turagu, e Titus.<sup>r</sup> Lakea a pe e huriki a Troas, a valai koea o Masedonia.

<sup>14</sup>Pali iau a kavurike hateke a Vure. Mi rihi e Kristo, a Vure i tuli mia na matane huriki lobo, mi manga a vorakato vona i lakavu na vabinga.<sup>s</sup>

---

<sup>k</sup> **1:24** 1Pe 5:3   <sup>l</sup> **2:1** 1Ko 4:21   <sup>m</sup> **2:4** Apo 20:31   <sup>n</sup> **2:11** Luk 22:31   <sup>o</sup> **2:12** Apo 14:27; 1Ko 16:9   <sup>p</sup> **2:12** E Troas a tanga dagi tabukoi na dari. I tabuli na tabeke ne Asia, ra provins tara ne Rom.   <sup>q</sup> **2:13** Apo 20:1   <sup>r</sup> **2:13** E Titus i leho turane Paulus, i manga e Timoti tara i leho turana. Ni here vona na buk nga: 2 Korin, Galesia, 2 Timoti, Titus. A buk ne Titus, e Paulus i hereia i lakea ne Titus.   <sup>s</sup> **2:14** E Paulus i taki virihi a narone huriki a ubu ne Rom. Na tahuna ri mulangi na vabinga dagi, bara ri hamule o Rom, ri dili na tanga. A ubu bara i muga ne huriki a nugumaheto vona, turana e huriki a vorakato ri lakavu na vabinga.

I rudu tala mia, mi vakalongo lae a Velenga Kamumu, i manga a pokona havu mangisipa i huli lae. <sup>15</sup>Si manga a havu mangisipa e Kristo i habi lakea na Vure. A mangine hita i huli lae ne huriki a Vure i korimule ria, i huli lae ne huriki ri velu. <sup>16</sup>Na tahuna e huriki a Vure i korimule ria ri burongi, i manginoro, a vuhuna i vakasiri ria ri gi mahuri vakaroro. Pali na tahuna e huriki ri velu ri burongi, i mavuru, a vuhuna i vakasiri ria bara ri vurua. E rei i kara ni ratea a leho iea? <sup>17</sup>E huriki ranga ri vara e huriki na nitana Vure, ri ngaru ri gi bole a moni vona. Pali i uka ma a rata mavonga. A Vure i rudu iau, lakea a vara e huriki na naro muholi na matana Vure, manga a vora ne Kristo.

**3** <sup>1</sup>"Ra mua, mu luhoi a bibi rike mule a ragu? Mu luhoi ga manga e huriki a mari ni tovo ranga, ga ngaru tarabakovi ge here tara raukea, ge bibi rike iau, mu gu ngaru iau? Mu luhoi ga ngaru mua mu gu herea tara raukea maea? I uka liu! <sup>2</sup>"Mua kunana, mu manga a raukea i bibi rike iau, ni here na hategu. E huriki ri masia, ri gia. <sup>3</sup>"Mu vakasiri mua, mu manga a raukea e Kristo i herea, i vakaru poloa nau. I uka ma i herea na limana, i herea na Hanuna Vure i mahuri vakaroro. I uka ma i herea na kedo. I herea na hatene mua.

<sup>4</sup>A ngava iea a lohoka vona i muholi, a vuhuna a luhoi torea a Vure ge kori iau polo ne Kristo. <sup>5</sup>Iau i uka ma a kara ga rata kikeri a leho iea. Iau i uka ma ga taki a kara ni ratea tara maki na matana Vure. A Vure kunana i habi a nitora nau ga rata a leho vona. <sup>6</sup>\*A Vure kunana i habi a nitora nau, ga vakalongo e huriki na ngava dagi karaba. A ngava dagi karaba iea i uka ma i ramai a vinara. I ramai a Hanuna Vure, a vuhuna a vinara i vakabele a matenga, pali a Hanuna Vure i habi a nimahuri vakaroro.

<sup>7</sup>\*A Vure i here na kedo a vinara, i habi ne Moses. Ra vinara iea i vakabele a matenga. A matane Moses i para na bagetua na Vure. Lakea e huriki a Israel ri keri ni matanonoa a matane Moses, a vuhuna a nipara na matana i para dagi hateka. Pali a nipara iea, muri i maravunu. <sup>8</sup>Pali a bagetuanga na leho na Hanuna Vure i kamumu hateka na bagetua na leho na vinara. <sup>9</sup>\*A vinara, ra i taki e huriki lobo ri gi mate, i tahoka a bagetua vona. Pali a leho ne Kristo, ra i rata hita si malamala, a bagetuanga vona i kamumu hateka. <sup>10</sup>Ngane a vinara a Vure i habia ne Moses i uka bagetua vona, a vuhuna a leho na Hanuna Vure i tahoka a bagetuanga i dagi hateka. <sup>11</sup>A vinara a Vure i habia ne Moses, i tahoka a bagetua, pali i tabuli popote kunana, i lobo. Pali a leho na Hanuna Vure i tahoka a bagetuanga i dagi hateka, bara i tabuli vakaroro.

<sup>t</sup> **2:16** Luk 2:34; 2Ko 3:5-6    <sup>u</sup> **3:1** Apo 18:27; 2Ko 5:12    <sup>v</sup> **3:2** 1Ko 9:2;  
2Ko 7:3    <sup>w</sup> **3:3** Nim 24:12; Jer 31:33; Ese 36:26-27    <sup>x</sup> **3:6** Jer 31:31; Ion 6:63; 1Ko 11:25  
<sup>y</sup> **3:7** Nim 34:29    <sup>z</sup> **3:9** Vin 27:26; Rom 1:17

<sup>12</sup>A ta kavakava kunana ne huriki. I uka ma a mangenge, a vuhuna a lohoka vona a ngava iea i muholi. <sup>13</sup><sup>a</sup>I uka ma a manga e Moses. E Moses i marikoi e huriki a Israel ri gi matanonoa a nipara na matana na tahuna i hoho puru. I maruhu, lakea i kavitagua a matana na lavalava. <sup>14</sup>Pali e huriki a Israel ri gigi tora. A gine ria i uvo na tahuna ri gi a ngava dagi hosi, i valai i harena mona. I manga a lavalava iea, e Moses i kavitagu a matana vona, i kavitagu a niluhoi ne ria. E Kristo kunana i kara ni vuka tala a maki i kavitagu a niluhoi ne ria, ri gi longokilala a ngava. <sup>15</sup>I muholi, na tahuna ri gi a hinere ne Moses, i manga a lavalava iea i tabana i kavitagu mavonga a niluhoi ne ria. <sup>16</sup><sup>b</sup>Pali na tahuna e huriki ri luhoi torea e Bakovi Dagi, i manga a lavalava i kavitagu muga a niluhoi ne ria, ni vuka tala. <sup>17</sup><sup>c</sup>E Bakovi Dagi a ta vona, ra Hanu Kiripiripi. E huriki ri tahoka a Hanune Bakovi Dagi ri matukapaga na vinara hosi. <sup>18</sup>Lakea hita lobo si matanonoa a bagetuanga ne Bakovi Dagi, a matane hita i uka ma ni kavitagu. I leho ni rata hita si gi manga ia, i rata maea, muri ma bara si manga muholi ia. A naro iea i valai na Hanune Bakovi Dagi.

### A Nipara na Velenga Kamumu

**4** <sup>1</sup>Lakea i uka ma ge tohai a kuligu ni tovo e huriki na nitana Vure, a vuhuna a Vure i dodo iau, i habia nau a leho iea. <sup>2</sup><sup>d</sup>Pali a marikoi hateka a naro hale kapiloho a naro ni maruhu. A marikoi ni tami e huriki. A marikoi ni palele a nita na Vure. A ta kavakava kunana na ngava muholi, e huriki ri gi matakilala na hatene ria, iau a bakovi navai na matana Vure. <sup>3</sup>E huriki ranga ri taki ta a Velenga Kamumu nau i uka ma i kavakava. A hini i uka ma i kavakava ne ria, a vuhuna ri velu, bara ri puru na kanono. <sup>4</sup><sup>e</sup>A vure na malala<sup>f</sup> i vakauvo a niluhoi ne huriki i uka ma ri luhoi torea e Kristo, i uka ma ri gi matai a nipara na Velenga Kamumu na bagetuanga ne Kristo, re Kristo ia a Vure. <sup>5</sup>Iau a vara e huriki, i uka ma a bibi rike mule a ragu. A tovo e huriki vona e Isu Kristo a Bakovi Dagi, pali iau a vora ne mua na ningaru ne Isu. <sup>6</sup><sup>g</sup>A Vure, ra viri i ta maea, “Ge palala,” ia kunana a Vure i vakapalala a gine hita, si gi lohoka vona a bagetuanga na Vure, ra i para na matane Isu Kristo.

### A Ulo

<sup>7</sup><sup>h</sup>A mahala nga i tabuli pololilo nau, ra iau a maki tavula manga a ulo. I vakasiri manga a uka nitora. A nitora lobo na Vure. <sup>8</sup><sup>i</sup>Iau ni vakamadihi na naro i kupo, pali i uka ma a vurua. A loho lege, pali i uka ma a rihate.

<sup>a</sup> 3:13 Nim 34:33    <sup>b</sup> 3:16 Nim 34:34    <sup>c</sup> 3:17 Ion 8:36; Rom 8:2    <sup>d</sup> 4:2 2Ko 2:17; 1Tes 2:5

<sup>e</sup> 4:4 Epe 2:2; Kol 1:15; Hib 1:3    <sup>f</sup> 4:4 A vure na malala, re Satan.    <sup>g</sup> 4:6 Vuh 1:3; Ais 9:2; 2Ko 3:18    <sup>h</sup> 4:7 2Ko 5:1    <sup>i</sup> 4:8 2Ko 1:8; 7:5

<sup>9</sup>E huriki ri habi a nimadihi nau, pali a Vure i uka ma i lohopile iau. E huriki ri lagu iau, pali i uka ma a mate. <sup>10</sup><sup>j</sup>Na parava vakaroro e huriki ri ngaru ni rabalaki iau, i manga hosi ri ratea ne Isu. Na naro iea, i bele kavakava ne huriki, ne Isu i mahuri mule pali na matenga. <sup>11</sup><sup>k</sup>Na tahuna a made na malala, i tahoka e huriki ri ngaru ni rabalaki iau a vuuhuna a ramaia e Isu. Na naro iea, e huriki bara ri matakilaka vona e Isu i mahuri mule pali na matenga. <sup>12</sup>I mavonga, na parava vakaroro a popote ga mate, lakea mua mu gu bole a nimahuri vakaroro.

<sup>13</sup><sup>l</sup>Iau a luhoi torea a Vure, i manga a viri i herea na hinere, i ta maea, "A luhoi tora ioe, lakea a taki tala." Iau tara a luhoi torea a Vure, lakea a taki tala. <sup>14</sup><sup>m</sup>A lohoka vona a Vure i vakamahuri mulea e Isu a Bakovi Dagi. I mavonga, bara i vakamahuri mule hita turane Isu, ge bole hita, si gi made turana. <sup>15</sup>A kaloho a maregoa nga ne vona ni tuhori mua, lakea a naro kamumu na Vure ge bele ne huriki ala kupo, ge vano vano, bara e huriki ala kupo ri kavurikea a Vure, ri vakabagetau.

<sup>16</sup><sup>n</sup>I mavonga, i uka ma ge tohai a kuligu. A maka maregoa ri rata a kakaigu i viru, i malulu. Pali a Vure i vakatora a hategu na parava vakaroro. <sup>17</sup><sup>o</sup>A maka maregoa a bole na parava i popote ngane, i uka ma a maki dagi hateka, a vuuhuna i rata puru nau a bagetuanga i dagi hateka, ge tabuli vakaroro. A bagetua nga ri rangi hateka a maka maregoa a bole ngane. <sup>18</sup><sup>p</sup>Ngane i uka ma a roe na maki a matai. A roe na maki si keri ni matai, a vuuhuna a maki si matai ngane i uka ma ge tabuli vakaroro. Pali a maki si keri ni matai ngane bara ri tabuli vakaroro.

### A Kakaine Hita na Hunu

**5** <sup>1</sup><sup>q</sup>A kakaine hita i manga a kape kunana, i uka ma ge tabuli tabaka. <sup>2</sup>Na tahuna si mate, a Vure bara i habi a kakaine hita karaba, ge tabuli vakaroro meli na hunu. <sup>3</sup>Na tahuna si made na kakaine hita na malala, si bole a nimadihi si dedo, si pasimata ni bole a kakaine hita na hunu. <sup>4</sup>Na tahuna si tabana na kakaine hita, ra i manga a kape, si bole a nimadihi, si dedo. I uka ma i manga si ngaru ni mate, si gi pe a kakaine hita. Pali si ngaru ni bole a kakaine hita karaba meli na hunu. A kakaine hita karaba, ra ge mahuri vakaroro, bara i kuloi a kakaine hita ra bara i mate. <sup>5</sup>A Vure kunana a viri i pelekado puru hita, ge bele ne hita a naro iea. I habi ne hita a Hanuna, ge a kilakila na hini a Vure i ta muholi ge habi ne hita a kakaine hita karaba.

<sup>6</sup><sup>s</sup>I mavonga, i uka ma a mangenge vona tara maki. A lohoka vona na tahuna a tabana ni made na kakaigu, a made basi ne Bakovi Dagi. <sup>7</sup>I uka

---

<sup>j</sup> 4:10 1Ko 15:31   <sup>k</sup> 4:11 Rom 8:36   <sup>l</sup> 4:13 Sng 116:10   <sup>m</sup> 4:14 1Ko 6:14   <sup>n</sup> 4:16 Epe 3:16  
<sup>o</sup> 4:17 Rom 8:17-18   <sup>p</sup> 4:18 Kol 1:16   <sup>q</sup> 5:1 2Ko 4:7   <sup>r</sup> 5:2 Rom 8:23   <sup>s</sup> 5:6 Hib 11:13-16

ma a masia e Bakovi Dagi a ramaia. A ramaia, a vuhuna a luhoi torea.  
 8<sup>t</sup>I uka ma a mangenge vona tara maki, a vuhuna i kamumu ga mate,  
 ga pe a kakaigu, ga made turane Bakovi Dagi. 9<sup>u</sup>Iau ga made koea na  
 malala, o iau ga made na hunu turane Bakovi Dagi, a ningaru dagi nau,  
 ga vakavivia, 10<sup>a</sup>a vuhuna hita lobo bara si pesi na matane Kristo, ge  
 pelekado hita. Muri bara si bole a mapane hita takutaku na narone hita  
 koea na malala. E huriki ri rata a naro kamumu bara ri bole a mapane  
 ria. E huriki ri rata a naro hale, ria ranga bara ri bole a mapane ria.

### A Leho ni Rata e Huriki Ge Ria a Taho na Vure

11 I mavonga, a ta tora hateka vakaroro ne huriki ranga ri gi luhoi  
 torea e Kristo, a vuhuna a mangenge ne Bakovi Dagi. A Vure i lohoka  
 vona, iau a bakovi navai. A luhoi mua ranga mu lohoka nau na hatene  
 mua. 12<sup>A</sup> Ngava iea, i uka ma a bibi rike mule a ragu, mu gu ngaru iau.  
 A taki, mu gu vivi nau, mu gu kara ni koli a ngava ne huriki ri bibi rike  
 mule a rane ria. E huriki ri bibi rike mule ria na hini a leho ne ria i mata  
 kamumu hateka, pali a hatene ria i uka ma i malamala. 13<sup>E</sup> Huriki ranga  
 ri taki iau, ta a manga. I uka maki, a vuhuna a maki lobo a rata ne vona  
 ni ramai a ningaru na Vure. O ri taki a niluhoi nau i kamumu, mu lohoka  
 vona, iau a leho ni kori mua. 14<sup>E</sup> Kristo i ngaru hateka hita. A ningaru  
 vona i matakari iau. A matakilaka vona e Kristo i mate na murine hita  
 lobo. I mavonga, hita lobo, i manga si mate pali. 15<sup>w</sup>I mate na murine hita  
 lobo. I mavonga a maki lobo si gi rata, i uka ma si gi ramai a ningaru  
 ne hita. A maki lobo si gi rata, si gi ramai a ningaru na viri i mate na  
 murine hita, muri ni vakamahuri mule na matenga.

16 I mavonga, i uka ma ga luhoi kado tabu e huriki na niluhoi na  
 malala. Hosi a luhoi kadoa e Kristo na niluhoi na malala. Pali ngane  
 i uka ma a luhoi mavonga tabu. 17<sup>x</sup>Na tahuna a viri i rihi e Kristo, a  
 Vure i ratarike karabea, i manga a viri karaba. A rabu hosi vona i lobo.  
 Ngane i ramai a rabu karaba. 18<sup>y</sup>A Vure kunana a viri i rata a maki nga.  
 A Vure, na leho ne Kristo, i rata hita i uka ma hita a pile tabu na Vure.  
 Hita a taho vona. I habi a leho ne hita, si gi rata e huriki ranga, ge ria  
 a taho na Vure. 19<sup>z</sup>Ra i maea, na leho ne Kristo, a Vure i uka ma i luhoi  
 tabu a naro hale ne hita. I rata hita i uka ma hita a pile tabu. Si made  
 turana na nivalemu ngane. I habi a leho nau, ga rata e huriki ranga ri gi  
 made turana Vure na nivalemu. 20 Na naro iea, iau a vinuru ne Kristo. A  
 vakalongo polo ne huriki a ngavana Vure i nana tora e huriki ri gi pulo  
 a vilone ria. I mavonga, a nana tora mua na rane Kristo, mu lobo ni pilea  
 a Vure, mu made turana na nivalemu. 21<sup>a</sup>A Viri i uka liu a naro hale, a

---

<sup>t</sup> 5:8 Pili 1:23   <sup>u</sup> 5:9 Kol 1:10; 1Tes 4:1   <sup>v</sup> 5:10 Sav 12:14; Rom 14:10   <sup>w</sup> 5:15 Rom 14:7-8  
<sup>x</sup> 5:17 Rom 8:1; Gal 6:15   <sup>y</sup> 5:18 Rom 5:10   <sup>z</sup> 5:19 Rom 3:23-25   <sup>a</sup> 5:21 Hib 4:15

Vure i ratea i bole a mapana naro hale ne hita, ne vona ni korimule hita. Lakea e rei a viri i rihi ia, bara i malamala na matana Vure.

**6** <sup>1</sup>Iau a leho turana Vure, lakea a taki tora mua, naha ni ngalahere a naro kamumu a Vure i rata virihi hita vona. <sup>2</sup><sup>b</sup>A nitana Vure i ta maea,

“Na parava a vulakia, a longo ioe.

Na tahuna a parava i bele ta ga korimule ioe, a kori ioe.”

Mu longo valai! A parava a Vure i vulakia i bele pali. Mona a parava a Vure ge korimule e huriki vona.

### A Maregoa i Bolea e Paulus

<sup>3</sup>Iau i uka ma a ratea tara maki ge rata e huriki ri gi sibo. I uka tara maki ni gi matai na leho nau ga rata halea. <sup>4</sup>A maki lobo a rata i vakasiri manga iau a vora na Vure. A hatenono na tahuna a bole a nimadihi, a maregoa, a vuranga, <sup>5</sup><sup>c</sup>e huriki ri hotu iau, ri ru dili iau na bavi, e huriki ri vapopo, ri vakamadihi iau. A leho hateka. I uka ma a mahita. A vitolo. <sup>6</sup><sup>d</sup>A vakasiri manga iau a vora na Vure na tahuna a made malamala. A tahoka a lohokanga. A hatenono ne huriki. A rata kamumu e huriki. A Hanu Kiripiripi i made turagu. A ngaru muholi e huriki. <sup>7</sup><sup>e</sup>A vakasiri manga iau a vora na Vure a vuhuna a ta muholi vakaroro. A nitora na Vure i tabuli nau. A naro malamala nau i manga a bainat a galeu nau. <sup>8</sup>A vakasiri manga iau a vora na Vure na tahuna e huriki ri togo iau, na tahuna e huriki ri biu iau, na tahuna e huriki ri harogi iau, na tahuna e huriki ri kavurike iau. Ri rata manga iau a nitamina vora na Vure, pali iau a vora muholi na Vure. <sup>9</sup><sup>f</sup>E huriki ri rata manga i uka tara viri ge lohoka nau. Pali e huriki lobo ri lohoka nau. Ri rata manga a mate, pali iau a mahuri. Iau ni vakamadihi, pali i uka ma a mate. <sup>10</sup>A made dukuduku, pali a vivi vakaroro. A made manga a matasia, pali a rata e huriki ala kupo ri tahoka a mahala. A made manga a uka liu a maki, pali a maki lobo ne nau.

<sup>11</sup>Iau a here kavakava lakene mua e huriki a Korin, a ngaru hateka mua. <sup>12</sup>A ngaru hateka mua na hategu, pali mua i uka ma mu ngaru hateka iau. <sup>13</sup><sup>g</sup>A ngaru mu gu ngaru iau i manga iau a ngaru mua. A ta maea, i manga a vara e huriki a koma.

### A Roho na Vure Mahuri

<sup>14</sup><sup>h</sup>Naha ni rihi e huriki i uka ma ri luhoi torea e Kristo, a vuhuna e huriki ri malamala ri vaperesi ne huriki ri putu puru a vinara. A ra maki kamumu ge bele na tahuna e huriki ri laho na nipara na Vure, ri gi laho

<sup>b</sup> 6:2 Ais 49:8   <sup>c</sup> 6:5 Apo 16:23; 2Ko 11:23-27   <sup>d</sup> 6:6 1Tim 4:12   <sup>e</sup> 6:7 Epe 6:1-20

<sup>f</sup> 6:9 2Ko 4:10   <sup>g</sup> 6:13 1Ko 4:14   <sup>h</sup> 6:14 Epe 5:11

turane huriki ri laho na uvo? <sup>15</sup>Re Kristo, ge valongo mai navai a ngava turane Satan? A viri i luhoi torea e Kristo, ge vaveru navai turana viri i uka ma i luhoi torea e Kristo? <sup>16</sup><sup>i</sup>Ni gi ru dili navai a nitamina vure na Roho na Vure? Pali hita a roho na Vure Mahuri. I manga a ngava a Vure i takia hosi, i maea, “Iau ga made turane ria, ga laho turane ria. Ge iau a Vure ne ria, ge ria e huriki a ngate nau. <sup>17</sup><sup>j</sup>E Bakovi Dagi ta maea,

‘Mu malele ha ne huriki i uka ma ria a ngate nau,  
naha ni laho turane ria.

Naha ni dili na maka naro katoki ne ria,  
lakea bara bole dili mua,

<sup>18</sup> <sup>k</sup>ge iau e tamane mua,  
ge mua e huriki e tugu a bakovi a ngatavine.

Iau e Bakovi Dagi Tuhaka Hateka a ta maea.’ ”

**7** <sup>1</sup>Mua o huriki a hategu, a ngava nga a Vure i ta muholi ne hita. I mavonga, si gi lohopile a maka rabu hale ri vakakatoki a kakaine hita, a hanune hita. Si gi mangenge na Vure, si gi bele malamala.

### E Paulus i Vivi

<sup>2</sup>Mu ngaru iau na hatene mua. I uka ma a rata halea tara viri. I uka ma a vakahalea tara viri. I uka ma a tamia tara viri ga bole a moni vona.

<sup>3</sup>A ngava iea a takia, i uka ma a padi virihi mua. A taki pali mua, mua a hategu. Bara si made palupu, bara si mate palupu. <sup>4</sup>A ta kavakava ne mua, i uka ma a mangenge. A vivi hateka ne mua. Na tahuna a luhoi mule mua, a niluhoi iea i luke iau. Na tahuna a bole a maregoa, a vivi hateka a vuuhuna a luhoi mua.

<sup>5</sup><sup>l</sup>Na tahuna a bele na tabeke ne Masedonia, i uka ma a malo ranga. Na tanga lobo a lakea vona e huriki ri rata tuhare iau. Pali iau tara, a loho pae pae. <sup>6</sup>Pali a Vure i vakatora vakaroro a niluhoi ne huriki, i vakatorea a niluhoi nau na tahuna e Titus i bele. <sup>7</sup>E Titus tara i vakalongo iau ne mua, i taki iau vona a hini mu vakatorea a niluhoi vona. Na tahuna i ta mavonga, i vakatora tabua a niluhoi nau. I taki iau ne mua ta mu pasimata ni matai iau, mu kilu vona a maka maregoa mu vakabele. E Titus i vakalongo iau ne mua, mu ngaru hateka ni ramai a nitagu. Na tahuna i vakalongo iau vona a maka ngava nga, iau a vivi hateka. <sup>8</sup><sup>m</sup>A raukea muga a here lakene mua i rata mua mu dodo, pali i uka ma a kilu vona a raukea a herea. I muholi a kilu popote muga. Pali a matakilaka vona na tahuna mu gia a raukea iea, mu dodo na parava popote kunana. <sup>9</sup>Ngane a vivi. I uka ma a vivi vona a hini mu dodo. A vivi a vuuhuna a nidodo i rata mua mu pulo a vilone mua. A nidodo ne mua i valai na Vure, lakea i uka ma a vakamarego mua.

<sup>1</sup> 6:16 Levi 26:12; 1Ko 3:16   <sup>j</sup> 6:17 Ais 52:11; Kap 18:4   <sup>k</sup> 6:18 2Sam 7:14; Jer 31:9

<sup>1</sup> 7:5 2Ko 2:13   <sup>m</sup> 7:8 2Ko 2:4

<sup>10</sup><sup>n</sup>Na tahuna a viri i dodo na rabu hale vona ge manga a hini a Vure i ngarua ge rata, bara i pulo a vilona, i bole a nimahuri vakaroro. I uka ma ge kilu vona. Pali a viri i dodo na nidodo na malala, i uka ma ge pulo a vilona, i uka ma ge bole a nimahuri vakaroro. Bara i mate. <sup>11</sup>Mu dodo na nidodo i valai na Vure, lakea i rata mua mu ngaru hateka ni vakasiri manga i uka ma mu tahoka a ngava vona a nimava iea. Mu tahate kamumu vona a maregoa i vakabele a bakovi iea. Mu mangenge hateka na maki i ratea. Mu ngaru hateka ni matai iau. Mu vakamadihi kamumua ra viri i vakabelea a maregoa iea. A maki lobo mu rata, mu vakasiri manga mu uka ngava vona a maki iea. <sup>12</sup>Ra raukea a here mugea, a herea i uka ma ga pelekado a viri i rata a naro hale, o ga kori a viri ni rata virihi na naro hale vona. A here lakene mu gu matakilaka vona na matana Vure manga mu togo iau. <sup>13</sup>Na naro iea mu vakatorea a niluhoi nau. Mu vakatorea a niluhoi ne Titus, lakea na tahuna i valai koea, a masia i vivi hateka, lakea iau tara a vivi. <sup>14</sup>Hosi a vakalongoa e Titus a bibi rike hateka mua. Muri i vano i made turane mua, i uka ma a maruhu. A ngava a takia i muholi, i manga a ngava lobo a taki mua vona i muholi kunana. <sup>15</sup>Ngane e Titus i ngaru hateka tabu mua, a vuhuna i luhoi mule a hini mu longototo ia, mu taguia, mu togoa. <sup>16</sup>Ngane a vivi hateka, a vuhuna a lohoka hateka ne mua, mu rata a maki lobo a Vure i ngaru.

### Mu Hatebalala

**8** <sup>1</sup><sup>o</sup>Mua o huriki a turagu, ngane a ngaru ni taki mua, a Vure i rata kamumu e huriki a tara vona o Masedonia. <sup>2</sup>Ri dili na nitoni dagi na maregoa dagi ri bolea, pali ri vivi hateka, ri hate balala. I muholi ri matasia, ri bala a moni, pali a kinori ne ria i dagi hateka. <sup>3</sup>Iau a ta muholi, i uka ma ri habi a moni ri kara ri gi habi. Na ningaru ne ria kunana, ri habi i kupo! <sup>4</sup>Ri taki tora iau i uka ma ga pupukari ria. Ri ngaru hateka ni tuhori e huriki a tara na Vure o Judea. <sup>5</sup>A luhoi ri gi habi popote, pali ri habi i kupo. Muga ri habi mule ria ne Bakovi Dagi. Muri ri habi ria nau, i ramai a ningaru na Vure. <sup>6</sup>I mavonga a taki torea e Titus, ra i vakatubu turane mua, ge tuhori mua mu gu vakalobo a leho na nidodo iea. <sup>7</sup><sup>p</sup>Mu moro hateka na maki lobo mu rata. Mu moro ni luhoi tora. Mu moro ni ta. Mu moro na lohokanga. Mu moro ni vakasiri iau vona a ningaru dagi ne mua. I mavonga, mu vakasiri iau vona mu moro tabu na leho iea na nidodo.

<sup>8</sup>A ta maea, i uka ma a vakuku mua. A vakalongo mua vona a ningaru dagi ne huriki ranga, ri ngaru ni kori, mu gu longoaa, mu gu vakasiri mua ranga, i muholi a ningaru ne mua. <sup>9</sup><sup>q</sup>Mu lohoka vona a naro kamumu ne

<sup>n</sup> 7:10 Mat 27:3-5; Hib 12:16-17    <sup>o</sup> 8:1 Rom 15:26; 2Ko 9:1-2    <sup>p</sup> 8:7 1Ko 16:1-2

<sup>q</sup> 8:9 Mat 8:20; Pili 2:6-7

Isu Kristo a Bakovi Dagi ne hita. Muga ia a bakovi na mahala, i tahoka a maki lobo. Pali i luhoi mua, i taparaki a maki lobo nga, i bele manga a matasia. I rata mavonga, mu gu bele manga a bakovi na mahala, a mahala lobo na Vure ge ne vone mua.

<sup>10</sup>Iau a luhoi maea. I kamumu mu gu vakalobo a maki mu tubu na pida i lakea pali. Na tahuna ie, mua kunana mu ngaru muga ne huriki lobo ni habi a kinori. Mua kunana mu tubu muga ne huriki lobo ni ru kadolu a moni. <sup>11</sup>Ngane mu vakalobo a maki mu tubu pali ni ratena. Ra hini muga mu ngaru hateka ni habi a kinori, ngane a moni mu gu habi ge karea a ningaru muga ne mua. A nihabi ne mua ge ramai a ra maki mu tahoka. <sup>12</sup><sup>r</sup>Mua bara mu ngaru hateka ni habi a maki na Vure, mu habi ge ramai a ra maki mu tahoka, lakea a Vure bara i vivi vona a maki mu habi. A Vure i uka ma i ngaru mu gu habi a maki i uka ma mu tahoka. Mu habi kunana a maki mu tahoka. <sup>13</sup>Na tahuna mu tuhori e huriki e turane mua, mu habi tavula a maki ne ria, i uka ma a ngaru mua mu gu bala a maki. A ngaru mua lobo mu gu palupulupu. <sup>14</sup>Ngane mu tahoka a mahala i kupo. I kara mua mu gu kori e huriki ri bala a maki. Muri ma, na tahuna mu bala a maki, pali ria ri tahoka a mahala i kupo, bara ri kori mua. Na naro ie, e huriki lobo bara ri palupu. <sup>15</sup><sup>s</sup>I manga a ngava ni here puru hosi na hinere, i ta maea, “E huriki ri poi i kupo, ri kani, pali i uka kalavana maki ge tabuli mule. E huriki ri poi i popote kunana, ri kani, ri maru.”

### E Titus

<sup>16</sup>Iau a kavurikea a Vure, a vuhuna i ratea e Titus i ngaru hateka mua, i manga iau a ngaru hateka mua. <sup>17</sup>Na tahuna a takia e Titus ge lakene, i vivi vona a ngavagu. Ia tara i ngaru hateka ni lakene. <sup>18</sup>Ga rudua a turane hita tara ge tungaria e Titus. A bakovi ie a kamumu hateka ni taki tala a Velenga Kamumu, lakea e huriki a tara na Vure koea ri kavurikea. <sup>19</sup>A bakovi ie a kunana, e huriki a tara na Vure koea ri vulakia ge laho turagu, miri gi taparakia a moni o Iudea ne vona ni kori ria. A leho ie, i vakadagi a rane Bakovi Dagi, i vakasiri e huriki a ngaru hateka ni kori. <sup>20</sup>Mete ge laho palupu, nahea tara viri ge padi virihi tavula iau, ta a vakavaroru a moni ne huriki ri hate balala, ri habi. <sup>21</sup><sup>t</sup>A ngaru ni rata a naro kamumu na matane Bakovi Dagi, na matane huriki a bakovi a ngatavine.

<sup>22</sup>A bakovi tara tabu, e turane hita, ga rudua ge tungaria e Titus. A bakovi ie a vakasiri pali a ningaru dagi vona ni ratea a leho ne Bakovi Dagi. I lohoka vona mu ngaru hateka ni kori e huriki, lakea ia tara i ngaru hateka ni lakene. <sup>23</sup>E Titus, a vulakia ge lakene, a vuhuna i

<sup>r</sup> 8:12 Mrk 12:43-44    <sup>s</sup> 8:15 Nim 16:18    <sup>t</sup> 8:21 Snd 3:4

tungari vakaroro iau, miri kori mua. A bakovi ala rua nga, ra ru gu tungaria e Titus, rua a vinuru ne huriki a tara na Vure koea. A narone rua i kamumu, lakea e huriki koea ri kavurikea e Kristo ne rua.<sup>24</sup><sup>a</sup> A ngaru mu gu vakasiri tou a narone mua na nivangaru, lakea e huriki a tara na Vure ri gi matakilaka vona i navai a bibi rike a rane mua.

### A Kinori Ge Lakea ne Huriki a Iuda

**9** <sup>1</sup>I uka a vuhuna ga taki mua mu gu kori e huriki a tara na Vure o Iudea, <sup>2</sup>a vuhuna a lohoka vona mu ngaru hateka ni kori ria. Iau a bibi rike a rane mua pali ne huriki a tara na Vure o Masedonia. A vakalongo ria ne mua e huriki a Akaia, mu vakatubu na pida i lakea pali ni ru palupu a moni. Na tahuna ri longo mua mu ngaru hateka ni habi a moni, ria ranga ri ngaru hateka ni habi a moni.

<sup>3</sup>Pali ngane ga rudu lakene mua a bakovi ala tolu nga, to go tuhori mua ni ru palupu a moni. Muri e huriki lobo ri gi matakilaka vona a ngava a bibi rike a rane mua vona i muholi. <sup>4</sup>Muri, e huriki a Masedonia, ma ri gi lakene turagu ri gi matai mua i uka ma mu ru palupu ma a moni. Bara maruhu. Mua ranga bara mu maruhu hateka, a vuhuna mu taki pali ta mu gu habi. <sup>5</sup>A koi mu gu maruhu, lakea a taki a bakovi ala tolu nga, to go muga lakene, to go kori mua ni ru palupu a moni, ra mu ta muholi vona muga mu gu habi. Lakea ra moni nga, a kinori ne mua, i uka ma mu gu habi tuhare. Bara mu habi na hatene mua.

<sup>6</sup><sup>w</sup>Mu luhoi kamumu a ngava nga: a viri i varo a uve popote bara i mirio a mavo popote kunana. Pali a viri i varo a uve i kupo bara i mirio a mavo i kupo. <sup>7</sup>Mua takutaku mu luhoi kamumu i riva moni mu gu habi. A viri i koi ni habi, nahea ge habi a moni. Naha ni habi tuhare, a vuhuna a Vure i ngaru e huriki ri habi na hatene ria. <sup>8</sup>Muri a Vure bara i hate balala, i vakatahoka mua vakaroro a maki mu ngaru. Bara mu tahoka hateka a maki, lakea bara mu kara ni tuhori e huriki ranga. <sup>9</sup><sup>x</sup>I manga a ngava ni here hosi na Hinere, i maea,

“I hate balala, i kori e huriki a matasia.

A Vure ge luhoi vakaroro a naro kamumu vona.”

<sup>10</sup><sup>y</sup>A Vure ra viri i habi a vutuna maki ni varo, i vakabele a maki ni kani ne huriki, ia kunana bara i vakabele a vutune mua ge kupo, ge rata a naro malamala ne mua ge tahoka a kanena i kupo. <sup>11</sup><sup>z</sup>I muholi, a Vure ge gamai mua na naro lobo, mu gu kara ni hate balala vakaroro. Na tahuna mete taparaki ne huriki a matasia a moni ne mua, bara ri kavurikea a Vure. <sup>12</sup>Na tahuna mu kori mavonga e huriki ranga, a kanena bara i rua. E huriki a tara na Vure bara ri bole a maki ri uka vona. E huriki ala kupo

<sup>a</sup> 8:24 2Ko 7:13-14   <sup>v</sup> 9:1 2Ko 8:1-7   <sup>w</sup> 9:6 Snd 11:24-25   <sup>x</sup> 9:9 Sng 112:9

<sup>y</sup> 9:10 Ais 55:10   <sup>z</sup> 9:11 2Ko 1:11; 4:15

bara ri kavurikea a Vure. <sup>13</sup>Na tahuna mu kori e huriki maea, bara ri vakabagetua a Vure. A naro hate balala ne mua, mu kori e huriki nga, mu kori e huriki a tara na Vure lobo, bara i vakasiri manga mu longototo a Velenga Kamumu ne Kristo. <sup>14</sup>Muri, bara ri ngaru hateka mua, ri vasileki ne mua, a vuhuna bara ri luhoi mule a hini a Vure i rata a naro kamumu hateka ne mua. <sup>15</sup>Si gi kavurikea a Vure vona a maki i habi tavula ne hita. I kamumu hateka, si keri ni tuveve polo na ngava!

### A Leho ne Paulus

**10** <sup>1</sup><sup>a</sup>Iau e Paulus, ngane a ngaru hateka mu gu longo iau. Iau a bakovi madoru, i manga e Kristo ia a bakovi madoru. I ranga ne mua ri pahaluhoi ta iau a mangenge ni ta puhaki mai mua na tahuna a made turane mua, pali na tahuna a made basi, a here a raukea, a ratapile mua na ngava. <sup>2</sup><sup>b</sup>Pali a taki tora mua, mu pulo a vilone mua. Bara mu rata mavonga, na tahuna a bele lake i uka ma ga ta puhaki mai e huriki ri pahaluhoi ta a ramai a naro na malala.

<sup>3</sup>I muholi, iau a bakovi. Pali i uka ma a vaubi na naro na malala. <sup>4</sup><sup>c</sup>A lebo a bole, i uka ma a lebo na vabinga na malala. A lebo a bole a lebo tora na Vure. I tahoka a nitora ni ratapile a niluhoi na malala, ra niluhoi e huriki a pile ri taga vona. I tahoka a nitora ni ratapile a nitamina ngava ri gege hita vona. <sup>5</sup>A ratapile a niluhoi tagege lobo i rata e huriki i uka ma ri luhoi torea a Vure. A nugutata a niluhoi gigi tora ne ria, ri gi longototo a ngavane Kristo. <sup>6</sup>Muri, na tahuna mu longototo pali a ngavane Kristo, bara vakamadihi e huriki ri tabana ni longotaro.

<sup>7</sup>Mu luhoi kado kamumu a maki mu matai. E rei a viri i taki ia, ta ia a viri ne Kristo, ge matakilaka vona, iau tara a viri ne Kristo. <sup>8</sup><sup>d</sup>Ma mu gu luhoi iau, ta a bibi rike mule hateka a ragu vona a nitora e Bakovi Dagi i habia nau, ga matakari mua. A nitora iea, i habia nau, i uka ma ga ratapile mua. I habia nau ga do rike mua. I mavonga, i uka ma a maruhu vona.

<sup>9</sup>A here lakene mua, i uka ma ga vakamangenge mua. <sup>10</sup>E huriki ranga ri ta maea, “Na tahuna e Paulus i here, i ta puhaki hateka. Pali na tahuna i made turane hita, ia a malele piu, a ngavana i uka lehona.” <sup>11</sup>E huriki ri ta mavonga, a ngaru ri gi lohoka vona, i muholi, na tahuna a here lakene mua, a ta puhaki. Pali na tahuna a lakene, bara ta puhaki ne mua.

<sup>12</sup>Pali a keri ni taki iau ga kamumu i manga e huriki a bakovi ranga iene. Ri ta paki paki hateka. Ri bibi rike mule a rane ria, ri taki ta ri kamumu hateka. Na tahuna ri pelekado mule ria, ri matai kunana e huriki e turane ria, ri rangi ria o i uka. Ri manga manga!

<sup>a</sup> 10:1 1Ko 2:3   <sup>b</sup> 10:2 1Ko 4:21   <sup>c</sup> 10:4 Epe 6:13-17   <sup>d</sup> 10:8 2Ko 13:10

<sup>13</sup><sup>e</sup>A Vure i habi nau a leho. I uka ma ga bibi rike mule iau vona tara maki i tabuli polovavo na leho a Vure i habia nau. Ga vivi vona kunana a maka maki pololilo na leho a Vure i habia nau. Mua mu tabuli pololilo na leho ie. <sup>14</sup>I mavonga, na tahuna a vara mua, i uka ma a page poloa a leho a Vure i habia nau. Iau kunana a viri a vara muga mua. Iau a viri a bele muga na tabeke ne mua, a vakalongo mua na Velenga Kamumu ne Kristo.

<sup>15</sup>Iau i uka ma a bibi rike mule iau na leho na viri tara i ratea. A ngaru a niluhoi ne mua ne Kristo ge bele dagi, lakea a leho nau iene bara i bele dagi. <sup>16</sup>Muri bara lakea na maka tabeke mule lokovonga, ga vakalongo a Velenga Kamumu ne ria. A koi ni bibi rike tavula iau na leho na viri tara i ratea. <sup>17</sup><sup>f</sup>A hinere i ta maea, “A viri i ngaru ni bibi na maki tara, ge bibi vona a maki e Bakovi Dagi i rata.” <sup>18</sup><sup>g</sup>A viri i bibi rike mule a rana, nahea. Pali a viri e Bakovi Dagi i bibi rikea, ia a viri a Vure i ngarua.

#### A Nitamina Apostolo

**11** <sup>1</sup>Mu hatenono taro. Ga ta manga manga popote. Mu hatenono taro. <sup>2</sup><sup>h</sup>Iau a bage ne mua i manga a Vure i bage ne mua. Mu manga a sirula a habikaria na bakovi ala taku kunana, re Kristo. <sup>3</sup><sup>i</sup>Pali a mangenge, ma ni gi tami mua, mu gu lobo ni luhoia e Kristo na naro malamala, na naro muholi, i manga hosi a mata i tamia e Eva. <sup>4</sup><sup>j</sup>E huriki ranga ri bele ne mua, ri vara mua ne Isu, i tebi na ngava a vara mua vona, o ri vara mua, i tebi na Velenga Kamumu mu luhoi tora mugaea. Pali i navai mu vivi ni longo mai kunana?

<sup>5</sup><sup>k</sup>Re huriki nga, ri tovo mua na maka ngava taminga, ri taki ria, ta ria a apostolo kamumu hateka. Pali iau a lohoka vona, i uka ma ri rangi iau. <sup>6</sup><sup>l</sup>I muholi i uka ma a voro kamumu hateka a ngava. Pali i uka ma a bala a lohokanga. A vakasiri mavonga ne mua pali na naro legelege na parava vakaroro.

<sup>7</sup><sup>m</sup>Iau a tovo mua na Velenga Kamumu na Vure, lakea a vakakiroko iau, i uka ma a taki mua mu gu kona iau. Pali mu luhoi navai? A rata a rabu hale? <sup>8</sup><sup>n</sup>Na tahuna a tovo mua, e huriki a tara na Vure na tanga ranga ri kori iau na moni. Iau i uka ma a kori ria ri gi kona iau. I manga a bole tavula a moni ne ria, a lakene, a leho tavula turane mua. <sup>9</sup>Na tahuna a made turane mua, lakea a bala a maki, i uka ma a bole ne mua ranga maki. I uka ma a vakapae mua, a vuhuna e huriki a turane hita o Masedonia ri valai ri habi a maki nau. Hosi i uka ma a vakapae mua.

<sup>e</sup> 10:13 Rom 12:3   <sup>f</sup> 10:17 Jer 9:24; 1Ko 1:31   <sup>g</sup> 10:18 1Ko 4:4   <sup>h</sup> 11:2 Epe 5:26-27

<sup>i</sup> 11:3 Vuh 3:4,13   <sup>j</sup> 11:4 Gal 1:8-9   <sup>k</sup> 11:5 1Ko 15:10; 2Ko 12:11   <sup>l</sup> 11:6 1Ko 2:1,13

<sup>m</sup> 11:7 1Ko 9:18   <sup>n</sup> 11:8-9 2Ko 12:13; Pili 4:15-16

Muri ma ranga, i uka ma ga vakapae mua. <sup>10</sup>Iau a vivi vona a hini i uka ma a vakapae mua na tahuna a made turane mua. A ngava muholi ne Kristo i tabuli na hategu, lakea a taki muholi mua: I uka tara viri na tabeke ne Akaia ge hatekakari iau vona a ngava nga. <sup>11</sup>I navai a rata mavonga? A rata mavonga a vuhuna a ngaru hateka mua. A Vure i lohoka vona iau a ngaru hateka mua.

<sup>12</sup>I muga i uka ma a bole a moni ne mua, muri ma ranga i uka ma ga bole a moni ne mua. A rata mavonga, e huriki ri taki ta ria a apostolo kamumu hateka, i uka ma ri gi taki ri manga iau. <sup>13</sup>E huriki a bakovi nga, a nitamina apostolo. Ri tami e huriki na leho ne ria, ri tamilalu ta ria a apostolo ne Kristo. <sup>14</sup>I uka ma a turutu ne ria, a vuhuna e Satan tara i tamilalu, ta ia a agelo na nipara. <sup>15</sup>Lakea i uka ma si gi turutu vona na tahuna e huriki a vora ne Satan ri tamilalu, ta ria a vora malamala na Vure. Muri ma bara ri bole a mapana rabu hale ne ria.

### A Maka Maregoa e Paulus i Bole

<sup>16</sup>A taki tabu mua, naha ni luhoi ga ta manga manga. Pali mua mu gu luhoi ta iau a manga, pali, mu longo kunana a nitagu. Ga bibi taro. <sup>17</sup>Ra naro ni bibi rike mule iau, i uka ma a narone Bakovi Dagi. A narona manga. <sup>18</sup>Pali e huriki ranga ri leho turane mua ri bibi rike mule ria vona a leho na malala ri ratea. I mavonga, iau tara ga bibi rike mule iau. <sup>19</sup>Mu pahaluhoi ta mu moro hateka, pali mu vivi hateka ni longo mai a ngava ne huriki a manga. <sup>20</sup>I navai mu ngaru e huriki ri vakavora mua, ri bole tavula a maki ne mua, ri vakaholi mua, ri rata polo muga muga ne mua, ri ta hale mua? <sup>21</sup><sup>o</sup>Iau i uka ma a rata a maka rabu nga. Mu luhoi navai, ga maruhu a vuhuna i uka ma a kinigao ni rata a rabu hale nga? Iau ga bibi rike mule iau, a vuhuna e huriki a nitamina apostolo nga ri rata mavonga. Ngane a ta manga a manga. <sup>22</sup>Ri taki ria, ta ria a Hibru. Iau tara, iau a Hibru. Ri taki ria, ta ria a koma o Israel. Iau tara, iau a koma o Israel. Ri taki ria, ta ria a hamone Abraham. Iau tara, iau a hamone Abraham. <sup>23</sup><sup>p</sup>Ri taki ria ta ria a vora ne Kristo. Iau a rata hateka a leho ne Kristo! Masia, ngane a ta manga manga! Ri leho popote, pali iau a leho hateka. Ria, i uka ma ri dili na bavi, pali iau ni ru dili na bavi balaka kupo. Iau ni lagu hale balaka i kupo hateka, a keri ni gi. Iau popote ga mate balaka kupo. <sup>24</sup><sup>q</sup>Balaka lima e huriki a Iuda ri lakavu iau, ri lagu iau na lebo balaka ravulu tolu a polona i polova (39). <sup>25</sup><sup>r</sup>Balaka tolu e huriki a Rom ri lakavu iau, ri lagu iau na kai. E huriki a Iuda ri padi iau na keto, ta ri gi padimate iau. Balaka tolu a sip a rike vona i mabubu. Na parava tara a sip i mabubu, a pasi na utu na parava i taku, a rodo i taku. <sup>26</sup><sup>s</sup>Balaka kupo a havai, i bole butubutu iau a vuranga. Na tahuna ranga a bole butu a vuranga

<sup>o</sup> 11:21-22 Pili 3:5   <sup>p</sup> 11:23 Apo 16:23   <sup>q</sup> 11:24 Vin 25:3   <sup>r</sup> 11:25 Apo 14:19; 16:22

<sup>s</sup> 11:26 Apo 9:23; 14:5

na tahuna a tulu polo a naru. Na tahuna ranga a bole butu a vuranga na bakovi ni panaho. Na tahuna ranga a bole butu a vuranga ne huriki a viri nau a Israel. Na tahuna ranga a bole butu a vuranga ne huriki i uka ma ria a Israel. A bole butu a vuranga na maka tanga a bele ne ria. A bole butu a vuranga na robo i ngeki. A bole butu a vuranga na dari. A bole butu a vuranga ne huriki ri tatami ni ramai e Kristo. <sup>27</sup>A leho hateka, na parava ranga i uka ma a mahita kamumu. Na parava ranga a vitolo, a marohu, a malangangi a vuhuna a uka maki ni kavitagu iau vona.

<sup>28</sup>I uka ma a maki nga kunana a bole a maregoa ne ria. Pali na parava vakaroro a loho lege ne huriki a tara na Vure na maka tanga a tovo ria pali na Velenga Kamumu. <sup>29</sup>Na tahuna a longoa a turagu tara i uka ma i pesi tora ni luhoi e Kristo, a dodoa. Na tahuna a longoa a bakovi tara i tulia a turagu tara ge rata a naro hale, i madihi hateka a hategu.

<sup>30</sup>E huriki a nitamina apostolo nga ri bibi rike mule ria, lakea iau tara ga bibi rike iau. Pali i uka ma ga bibi rike iau na maki kamumu a rata. Ga bibi rike iau na hini a uka a nitora. <sup>31</sup>A Vure, e Tamane Bakovi Dagi ne hita, e Isu, ra ni gi kavurike ia vakaroro, i lohoka nau, i uka ma a tamimua. <sup>32</sup><sup>t</sup>Na tahuna a lakea o Damaskus a matakari i leho ne Aretas a hariki, i ngaru ni lakavu iau. Lakea i rudu e huriki a tagari ri gi lakavu iau na poridala na tanga. <sup>33</sup>Pali e huriki a turagu vongga ri vakatavore puru iau na gagana nure dagi na tanga, lakea a ha.

### E Paulus i Vurena

**12** <sup>1</sup>Ra hini a bibi rike mule iau bara i uka kanena, pali ga ta lokovonga. Ga vakalongo mua vona a vuregu, a maki e Bakovi Dagi i vakasiri a viri vona. <sup>2</sup>A lohoka vona tara bakovi i rihi e Kristo. Na pida i ravulu a polona i va (14) i lokovonga pali, a Vure i bole sikea na hunu. Na tahuna i sike lakea, i uka ma a lohoka vona, ia muholi, o i vurena kunana. A Vure i lohoka vona. <sup>3</sup>Ra bakovi ieia, ia muholi i sike na paradiso, o i vurena kunana, i uka ma a lohoka vona, a Vure i lohoka. Pali iau a lohoka vona <sup>4</sup>ni bole sike na hunu. I longo a maka maki, a ngavane hita i keri ni tuveve. A Vure tara i takia nahea ge tuveve polo.

<sup>5</sup>A maki ieia i bele, i kamumu ga bibi vona, pali i uka ma ga ratea. A maki bara bibi rike mule iau vona kunana, a hini iau a uka nitora. <sup>6</sup>Pali iau bara bibi rike mule iau, i uka ma ga manga, a vuhuna a ngavagu bara a ngava muholi. Pali i uka ma ga bibi rike mule iau, a vuhuna a koi e huriki ri gi pelekado iau na vuregu. A ngaru ri gi pelekado iau na maki a taki, na maki a rata. <sup>7</sup><sup>u</sup>Ni habi nau a maregoa, i uka ma ga gigi tora vona a maki a Vure i vakasiri nau. A vinuru ne Satan i rata iau, i uka ma ga gigi tora. <sup>8</sup>Balaka tolu a nana torea e Bakovi Dagi ge bole vurokia a

<sup>t</sup> 11:32-33 Apo 9:23-25    <sup>u</sup> 12:7 Jop 2:6

maregoa iea, <sup>9</sup>v10I mavonga a vivi kunana na tahuna a uka a nitora, e huriki ri harogi iau, a bole a maregoa, e huriki ri vakamadihi iau, a bole a nimadihi na rane Kristo. A vivi kunana, a vuhuna na tahuna a uka a nitora, a Vure i kori iau na nitora vona.

### E Paulus i Loho Lege ne Huriki a Korin

<sup>11</sup><sup>w</sup>Iau a ta manga a manga, pali mua kunana mu rata iau a ta manga a manga, a vuhuna i uka ma mu ta kamumu mai iau. Mua bara mu ta kamumu mai iau, a vuhuna re huriki mu taki ta ria a apostolo kamumu hateka, i uka ma ri rangi iau, ra iau a bakovi tavula. <sup>12</sup><sup>x</sup>Na tahuna a made turane mua, a hatenono ne mua, a vakasiri ne mua, ne iau a apostolo muholi. A rata a maka nivakasiri, a maki ni turutu vona, a vakasiri a nitora dagi. <sup>13</sup><sup>y</sup>I navai? Mu luhoi a rata kamumu e huriki a tara na Vure na tanga ranga, pali mua i uka ma a rata kamumu mua? I navai a hini mavonga? A bole a moni ne ria, pali i uka ma a bole a moni ne mua. Mu puga vuroki a naro hale nau!

<sup>14</sup>A made turane mua balaka rua pali. Ngane ga lakene tabu, ga made turane mua. I uka ma ga vakapae mua, ga nongi a moni. I uka ma a ngaru a moni ne mua. A ngaru mua. A koma i uka ma ge matakaria e tamana. E tamana bara i matakaria a koma. <sup>15</sup>Iau a vivi ni habi lobo ne mua a maki nau, ga kori a hanune mua. A vivi kunana ni kori mua na nitora lobo nau. Iau a ngaru hateka mua, pali mua i uka ma mu ngaru hateka iau. <sup>16</sup>Mu lohoka vona i uka ma a vakapae mua, ga bole a moni ne mua. Pali mu taki ta a tami mua, a bole a moni ne mua. <sup>17</sup>Na tahuna a rudu lakene e huriki a turagu, i uka ma ri bole a maki ne mua. <sup>18</sup><sup>z</sup>Na tahuna a rudu lakenea e Titus, a rudu tabua e turane hita tara i tungaria. Pali e Titus, i uka ma i bole a moni ne mua, a vuhuna a niluhoi, a narone maria e Titus i taku kunana.

<sup>19</sup>Mu luhoi navai, iau a herea a raukea iea ne vona ni tagari iau? I uka. Iau a rihi e Kristo, a herea a raukea iea na matana Vure ga vakatora a niluhoi ne mua. A maki lobo a rata ne vona ni vakatora mua kunana, mua e huriki a turagu. <sup>20</sup>Iau ga lakene, pali a mangenge, ma ga matai mua mu gu naro tebi na naro a ngaru ta mu gu rata. Lakea mua ranga, bara mu matai iau i mapulo a narogu. A mangenge ga matai mua mu gu vahehe, mu gu vamasigoro, mu gu vatahate, mu gu vapida lae, mu gu

<sup>v</sup> 12:9 Pil 4:11-13   <sup>w</sup> 12:11 2Ko 11:5   <sup>x</sup> 12:12 Rom 15:19   <sup>y</sup> 12:13 2Ko 11:9

<sup>z</sup> 12:18 2Ko 8:6,16-18

vapadimomo, mu gu ta tavulavula, mu gu putu ngingi, mu gu rata viliha.  
 21<sup>a</sup>A mangenge vona a Vure nau, ma ge vakakiroko iau na matane mua, bara tangi hateka a vuuhuna e huriki ri rata a rabu hale muga, i uka ma ri pulo ma a vilone ria. Re huriki ri rata a naro na molenga.

### A Nilobona Ngava

**13** <sup>1</sup><sup>b</sup>Iau a vano a made turane mua balaka rua pali. Ngane bara lakene tabu. I manga a ngava ni here na hinere i ta maea, “A viri ge ala rua, o ge ala tolu to go matai a viri i rata a naro hale, to go taki tala na murina na nivapelekado.” <sup>2</sup>Hosi, na tahuna a made turane mua, a vakalongo mua pali. Ngane a made basi, a vakalongo tabu mua. Na tahuna ga lakene, i uka ma ga dodoa tara viri. Bara vakamadihi e huriki ri rata a rabu hale, <sup>3</sup>a vuuhuna mu ngaru hateka iau ga vakasiri mua ne Kristo i ngavapolo nau na maka ngava a taki mua vona. E Kristo i uka ma i kori kiroko mua. I kori dagi mua. <sup>4</sup><sup>c</sup>Na tahuna e Kristo ni paditata na kai tavalavala, e huriki ri luhoi ta ia i uka nitora. Pali a nitora dagi na Vure i vakamahuri mule ia. I mavonga, iau a uka nitora, pali iau a mahuri na nitora dagi na Vure, i kori iau ga tuhori mua.

<sup>5</sup><sup>d</sup>Mu luhoi kado a nimadene mua, mu luhoi tora muholi, o i uka? Bara mu luhoi tora muholi, e Isu Kristo bara i made pololilo ne mua. O ge uka, i uka ma i made pololilo ne mua. <sup>6</sup>Iau a lohoka vona, na tahuna mu luhoi kado a maki lobo a taki, a maki lobo a rata, bara mu matakilaka vona iau a apostolo muholi ne Kristo. <sup>7</sup>A vasileki na Vure, nahea mu gu rata a naro hale. A vasileki mavonga, i uka ma ne vona e huriki ri gi matai iau a apostolo muholi. A vasileki mavonga, mu gu ramai a naro kamumu. I uka maki vona e huriki ri gi luhoi ta iau a nitamina apostolo. <sup>8</sup>I uka ma ga rata tara maki ge vakahale a ngava muholi na Vure. Ga rata kunana a maki ge ramai a ngava muholi na Vure. <sup>9</sup>Iau a vivi kunana na tahuna iau a uka nitora, pali mua mu kinigao. A vasileki hateka mu gu bele moro na niluhoi tora. <sup>10</sup><sup>e</sup>I mavonga a here lakene mua na tahuna a made basi ne mua. A ngaru na tahuna a luve ne mua, i uka ma ga ta puhaki mai mua na nitora e Bakovi Dagi i habia nau. A nitora iea i habia nau, i uka ma ga ratapile mua. I habia nau ga tuhori mua.

### E Paulus i Tarulu e Huriki

<sup>11</sup>Mua o huriki a turagu, a ngava nau i lobo. Mu vivi. Mu hamule mai a naro kamumu. Mu valuke. Mu pesi taku, na niluhoi ge taku. Mu made palupu na nivalemu. Na tahuna mu rata a naro nga, a Vure na naro na nivangaru, na naro na nivalemu, bara i made turane mua. <sup>12</sup>Mu vangaru,

<sup>a</sup> 12:21 2Ko 13:2    <sup>b</sup> 13:1 Vin 19:15; Mat 18:16; 1Tim 5:19    <sup>c</sup> 13:4 Pili 2:7-8

<sup>d</sup> 13:5 1Ko 11:28    <sup>e</sup> 13:10 2Ko 10:8

mu vatuba a lima. <sup>13</sup>E huriki a tara na Vure koea o Masedonia ri talo mua.

<sup>14</sup>E Isu Kristo a Bakovi Dagi ge rata a naro kamumu ne mua. A Vure ge vakasiri a ningaru dagi vona ne mua. A Hanuna Vure ge made turane mua lobo.